

光緒山西通志

仕實錄三

錄五之三

山西通志弟百四十七

賜進士出身頭品頂戴兵部侍郎兼都察院右副都御史巡撫山西提督軍務臣張煦奉
旨監修

宋遼金

藥元福并州晉陽人幼有膽氣善騎射初事邢帥王檀爲廳
頭軍使事後唐爲天平軍內外馬軍都指揮使晉天福中爲
深州刺史開運初駕駐澶淵契丹陣城北元福以左千牛衛
將軍領兵車陣東偏契丹盡銳來戰元福領二百騎躍出而
鬪奮鐵槌擊斃數人左右馳突無不披靡契丹兵潰上登城
望見召撫之曰汝奮不顧命雖古忠烈無以過擇名馬賜之
明年與李守貞等禦契丹於陽城爲右廂副排陣使士馬饑
渴契丹順風揚塵諸將欲俟風反戰元福曰軍中饑渴已甚

若俟風反出戰吾屬爲虜矣彼謂我不能逆風以戰宜出其
不意以擊之此兵家之奇也乃率麾下騎開拒馬出戰諸將
旣至契丹大敗追北二十餘里殺獲甚眾擢爲威州刺史會
靈武三族酋長拓跋彥超石存也所褒攻靈州節度王令溫
詔馮暉鎮朔方率關右兵進討以元福將行營騎兵朔方距
威州七百里無水草號旱海師須齋糧以行至耀德食盡比
明行四十里彥超等眾數萬布爲三陣扼要路據水泉以待
暉遣人賂之求和解往復數四至日中列陣如故元福曰彼
知我軍饑渴邀我於險旣許和解而日中未決此豈可信哉
欲困我耳遷延至暮則吾黨成擒矣暉驚曰柰何元福曰彼
雖眾而精兵絕少依西山爲陣者是也餘不足患元福請以
麾下騎先擊西山兵公但嚴陣不動俟敵少卻當舉黃旗爲

號旗舉則合勢進擊敗之必矣暉然其策遂率眾進擊敵眾果潰元福卽舉黃旗以招暉暉軍繼進彥超大敗橫尸蔽野是夕入清邊軍明日至靈州元福還郡詔賜衣帶繒帛銀器漢乾祐中從趙暉討王景崇於鳳翔蜀兵數萬來援都監李彥從軍卻元福領數百騎自後驅之下令還顧者斬眾皆殊死戰大敗蜀兵追至大散關殺二千餘人餘皆棄甲遁去鳳翔平以功遷淄州刺史周廣順初爲徐州行營兵馬都監平楊溫改陳州防禦使未幾王峻拒劉崇於晉州以元福爲西北面都排陣使軍過蒙阮與仇超陳恩讓追至霍邑峻止之元福曰宜追奔深入以挫其勢諸將畏懦遂止周祖後調兵戍晉州曰去年若從藥元福言則無邊患矣俄爲兗州行營馬步軍都虞侯討慕容彥超詔自晉州率所部入朝卽遣東

行賜六銖袍帶鞍馬器仗及至軍築連城圍兗彥超晝夜出兵屢擊敗之閉壁不敢出十餘日元福營柵皆就又穴地及築土山百道攻其城會周祖親征元福以所部先入羊馬城諸軍鼓譟角進拔之以功授建雄軍節度世宗圍太原城以糧運不繼班師元福上言曰進軍甚易退軍甚難世宗曰一以委卿遂部分卒伍爲方陣而南元福以麾下爲後殿崇果出兵來追擊走之師還加檢校太尉移鎮陝州又歷定廬曹三鎮宋初加檢校太師九月卒年七十七贈侍中元福雖老筋骨不衰人或言其氣貌益壯當復領兵必大喜時稱驍將薛懷讓其先戎人徙居太原少勇敢隸晉王帳下累歷軍職明宗時改神武右廂都校領獎州刺史東川董璋遣率軍從晉祖討賊賊平遷絳州刺史清泰初移申州晉天福中爲鄴

都招收使及戰中流矢詔賜湯藥存問又歷沂遼密懷四州
詔至闕賜襲衣玉帶爲青州行營先鋒都指揮使以功改宿
州團練使幸澶州命爲洺州團練使會符彥卿北征爲馬軍
左廂排陣使又從北面都招討杜重威爲先鋒都指揮使及
中渡橋降非其志也麻答守鎮州遣步健督洺州供運懷讓
聞漢祖舉義卽殺步健奉表歸漢麻答遣副將楊安以八百
騎攻懷讓又命剛鐵將三百騎繼之懷讓戰不勝退保州契
丹大掠及鎮軍逐麻答楊安遁邢州帥劉鐸又納款懷讓乘
其不虞遣人紿鐸請置頓鐸開門迎之懷讓殺鐸奪其城卽
授安國軍節度乾祐初移鎮同州周初賜襲衣金帶鞍勒馬
遣還任加同平章事劉崇入表求西征詔褒之俄爲左屯衛
上將軍世宗加左武衛顯德五年拜太子太師致仕恭帝封

杞國公宋建隆元年卒年六十九贈侍中懷讓好畜駝馬有大鳥小鳥尤奇駿漢隱帝使求之不獻及罷節鎮猶有馬百匹棗馳三十頭朝夕閱視爲娛云

侯章并州榆次人事後唐莊宗爲隊長明宗朝遷小校晉開運末爲忠衛指揮使屯陝州爲內外馬步軍都指揮使兼三城巡檢使與趙暉王晏謀斬遼將劉愿送款於漢祖擢鎮國軍節度乾祐初加同平章事尋移鎮邠州加檢校太師周初加兼侍中廣順二年入朝請開宴周祖謂左右曰諸侯來朝自當錫宴以申愷樂豈俟其貢奉爲之耶命復賜之仍令有司自今藩鎮有進奉者勿受俄賜宴廣政殿上壽復不納三年授鄧州節度封申國公世宗初加兼中書令征壽陽命爲攻城水砦都部署俄徙西北水砦再爲武勝軍節度宋建隆

元年八月授太子太師封楚國公既罷節鎮時有輕章者章厲聲曰當遼主謀歸有上書請避嵩山者我鐵人以戰鬪取富貴若此諛佞未嘗爲之坐中有慚者乾德五年卒

邊光範字子儀并州陽曲人性謙退和雅有吏才父仁嗣忠武軍節度副使光範後唐天成二年起家掄次令召爲殿中丞賜緋長興四年改太常丞晉天福初服闋授校檢戶部員外郎北京留守判官兼侍御史二年拜太府少卿上書曰臣聞唐太宗有言朕居深宮之中視聽不能及遠所委者都督刺史則知此官實繫治亂必須得人今則刺史或因緣世祿或貢奉家財或微立軍功或但循官序實恐撫民無術御吏無方以此牧民而民受其賜鮮矣望選能吏以蘇民瘼用致升平奏留中出帝初拜右諫議大夫權知開封府事遷給事

中使亳州括借軍糧稱平允開運元年權知鄭州拜左散騎
常侍二年入爲樞密直學士上以藩邸舊僚待遇尤厚因遊
宴見位翰林學士下卽日拜尚書禮部侍郎知制誥充翰林
學士仍值樞密院漢初改檢校刑部尚書衛尉卿上言伏見
朝廷除刺史不限年月或未及期年又聞除代往來跋涉豈
暇撫懷望慎選良牧立定年限以責輯綏之効不報乾祐二
年使虞城襄城按民田爲吳越加恩使廣順初出知陳州遷
祕書監俄召拜御史中丞賜襲衣銀器繒綵鞍勒馬復爲禮
部侍郎將及秋試言於執政曰他曹公事光範不敢辭若處
文衡校閱名賢品藻優劣非下走所能及期辭疾不出時論
多其自知世宗初改刑部侍郎權知開封府俄遷戶部顯德
三年檢大名民田五年普均租稅光範詣宋州韓通言其均

平世宗嘉之宋初征澤潞命爲前轉運計度鄭洛汝孟懷芻
糗拜太常卿以吏部尙書派昭耆老令僉判選事建隆四年
權知襄州路當衝會餉饋無闕召還復知襄州供億討蜀軍
人不知勞坐舉李穡左遷太子賓客仍知襄州五年兼橋道
使計工以州卒代民官給器用役不淹人人以無擾詔褒美
開寶四年復判吏部銓曹尋判御史臺事數月眞拜中丞六
年以疾解銓任卒年七十三光範性孝嘗吮母疽景德中錄
孫易從同學究出身

郭從義其先沙陀人父紹古事後唐武皇忠謹特見信任賜
姓李氏紹古卒從義纔卅角莊宗畜於宮中明宗與紹古款
狎卽位以從義補內職累遷內園使晉天福初復姓郭氏坐
事出爲宿州團練副使內艱歸遂家太原漢祖表爲馬步軍

都虞侯屢破契丹於代北及建大號從義首贊其謀擢鄭州防禦使充東南道行營都虞侯領首軍自太行路渡河爲河北都巡檢使討杜重威爲行營軍都虞侯重威降爲鎮寧軍節度討趙思綰爲行營都部署賜戎裝器仗金帶師至永興圍其城卽以爲永興軍節度思綰糧盡繫書矢上射城中說令降仍表於朝許以華州節制思綰開門納款翌日從義具軍容入城憩候館中思綰入謁卽令武士執之并其黨三百餘人悉斬於市以功加同平章事周廣順初加兼侍中移鎮許州顯德初加檢校太師征劉崇請扈從世宗甚悅改天平軍節度卽令從符彥卿破遼師於忻口以功加兼中書令四年移鎮徐州恭帝加開府階宋初加守中書令征揚州願扈從不允乾德二年爲河中尹護國軍節度六年疾歸開寶二

年改左金吾衛上將軍逾年拜太子太師致仕四年卒年六十三贈中書令從義性重厚有謀略多技藝尤善飛白書子守忠開慶副使守信字寶臣知書與士大夫游至東上閤門使知邢州卒子世隆比部員外郎世隆子昭祐承祐昭祐閤門祇候

武行德榆次人身長九尺材貌奇偉家貧負薪遇晉祖獵郊外見其所負倍常令力士更負皆不能舉高祖奇之因留帳下天福初授奉國都校改控鶴指揮使甯國軍都虞侯契丹擾汴被獲行德僞請自效契丹信之令率軍校載什物鎧甲送歸其國拏舟數十沂汴至河陰相與潛謀曰我輩皆受國厚恩與其離鄉井投邊塞曷若共守河陽俟敵兵退以圖富貴皆應曰諾卽共殺契丹監使分授器甲由汜水倍道抵河

陽契丹節度崔廷勲出兵來拒行德麾眾逆擊自旦及午殊死戰廷勲大敗棄城走遂據河陽盡以府庫分給將士因推行德知州事厲士卒繕甲兵據上游士氣益奮人望歸之閭漢祖起自稱河陽都部署遣弟行友由間道奉表勸進授河陽三城節度使乾祐中加同平章事移成德軍廣順初加兼侍中改忠武軍遷河南尹西京留守時鹽禁甚嚴有關吏與僧希賞令僧從民姬鬻蔬密寘鹽窖中姬持入城吏擒以送府行德覺其誣釋姬斬僧及關吏部下凜然顯德初封醴國公世宗加兼中書令令完洛陽城改封邢國節度武甯疏導甬橋東南汴洋達於泗上尋爲濠州行營都部署破淮軍二千俄屯定遠爲吳所敗五年復節度保大宋初加中書令封韓國改節忠武軍進魏國移鎮安州加開府儀同三司入爲

太子太傅太平興國三年致仕卒年七十二贈太師

李萬超并州太原人幼孤貧負販以養母隸晉祖軍籍戰累捷稍遷校從討楊光遠奮勇先登飛石中其腦氣不屬者久之開運中從拒遼師於陽城流矢貫手拔矢復戰神色自若以功遷肅銳指揮使開運末以本部屯潞州主帥張從恩將棄城歸遼太宗會前驍衛將軍王守恩服喪私第從恩委以後事及遼使至專領郡務守恩遂無所預萬超奮曰我輩垂餌虎口苟延旦夕之命今欲殺使保其城非止逃生亦足建勲業汝曹能乎眾皆喜曰敢不唯命遂率所部大譟入府署殺其使推守恩爲帥列狀以聞漢祖從其請仍命史宏肇統兵先渡河至潞見萬超曰得復此州公之力也吾欲殺守恩以公爲帥可乎萬超對曰若賊害於人自取其利非宿心也

宏肇太奇之表爲先鋒馬步軍都指揮使路經澤州刺史翟奇堅壁拒命萬超馳至城下曰并州劉公仗大義定中土所向風靡後服者族盍早圖之奇乃開門迎納宏肇卽留萬超權州事遂爲刺史及征李守貞爲行營濠碧使河中平拜懷州刺史周初從征慕容彥超又爲都濠碧使以功授沼州團練使預收秦鳳改萊州從平淮南連移斬登二州所至有善政屬有詔重均田租前平令馬陶隱苗不通命繫之將斬而後聞陶懼遁由是境內肅然宋初入爲右武衛大將軍遷左驍衛開寶八年卒年七十二

張從恩并州太原人父存信振武軍節度後唐明宗嘗隸存信麾下及卽位止授散秩從恩不得志乃退歸太原晉祖篡河東爲少帝娶從恩女晉初以外戚擢右金吾衛將軍歷襄

陽行營兵馬都監少帝初襄陽平遷檢校太尉開封尹充東京留守改鄴都留守錫賚加等仍賜銀裝肩輿二俾迎其家明年加同中書門下平章事命爲貝州行營都部署從恩至契丹將趙延昭遁去詔與杜重威合兵三萬北伐開運初改天平軍節度時十五將北征以從恩充北面行營都監二年移鎮晉州又改潞州漢祖至汴拜右衛上將軍奉朝請周初遷左金吾衛征兗州從行世宗加檢校太師封褒國公宋初改許國公以病免乾德四年卒

石驥并州太原人晉祖弟韓王暉之子天福中爲右神武將軍歷漢至周爲右武衛左神武二將軍恭帝初爲左衛將軍會高麗王昭加恩命副戴交充使宋建隆三年再使高麗還左驍衛大將軍護秦州屯兵西人犯邊擊破之斬渠帥十三

人太祖征晉領兵二千人自澤潞除道至太原壅汾水灌其城又益兵千人部攻遼州俄知雄州又爲潭州鈐轄開寶八年敗南唐軍二千餘於袁州平梅山板倉堵洞蠻寇俘該數千人太平興國中歷右神武右羽林大將軍連知孟襄二州遷領誠州刺史雍熙四年改知霸州兼部署陳廷山謀以平戍軍入北邊驍察知定計擒之以功加領本州國練使同知鎮州洹化二年移原州遷右龍武軍大將軍請告詔特給全俸四年卒年七十四贈賻加等

李洪信并州晉陽人漢昭聖太后弟六人洪信居長少善騎射後唐明宗在藩時隸帳下及卽位朱宏實總領捧聖軍擢爲爪牙漸遷小校廣順中少帝殺宏實而東捧聖軍數百騎從行洪信預焉及次衛州與晉高祖遇謀害之時漢祖方護

晉祖洪信以兵應之獲免清泰中又爲邕王重美牙校晉初
爲翼順左廂都指揮使漢祖鎮太原奏隸麾下漢初領陳州
刺史從降鄴以營扈勞授侍衛馬軍部指揮使領武信軍節
度乾祐中求解軍職出爲鎮甯軍節度歲餘遷保義軍節度
初楊邠令三司擇軍將分補諸鎮都押牙孔目官洪信聞內
難卽召悉殺之周廣順初加同平章事洪信常以安殺自歎
入朝懇辭藩鎮拜左武衛上將軍世宗初遷左驍衛顯德五
年改右龍武軍統軍從北征爲合流口部署宋乾隆五年改
左驍衛上將軍開寶五年致仕八年卒年七十四洪信以外
戚致位將相財累鉅萬時節鎮皆廣置帳下親兵惟洪信最
寡少弟洪義仕周永興軍節度宋初加中書令移鎮鄜州乾
德中卒

三金一十

ナ
/

張承德字抱一并州陽曲人不曾孫事繼母劉以孝聞周祖初爲侍衛吏與其父穎善乃以女妻承德承德迎其母妻詣宋州周祖爲樞密使表供奉官押班乾祐中命賜路帥常遇生辰禮幣遇周祖之外兄弟也時周祖鎮鄴被讒承德聞有密詔授遇探知其意謂遇曰願且以承德屬吏事成足以爲德不成死未晚遇令壯士嚴衛然餽之甚厚未幾周祖使至遇賀且謝曰老夫幾誤大事遂送承德歸周祖周初封妻爲晉國公主授承德左衛將軍內殿直小底四班都知加駙馬都尉領和州刺史累遷殿前都指揮使泗州防禦使時年二十四顯德元年世宗戰高平大將樊愛能何徽退衄時宋太祖與承德各領牙兵二千承德部下善左射屬兵分進大捷降劉崇軍七千餘及駐上黨世宗晝臥帳中召承德曰前日

之戰主將殊不用命吾將案之以法承德曰今止固守封疆則已必欲開拓疆宇威加四海宜痛懲其失世宗擲枕於地大呼稱善翌日誅二將以徇軍威大振進攻太原承德與符彥卿史彥超北控忻口契丹援兵至彥超戰沒繼敗其眾二千餘眾遁去以承德領武信軍節度師還徙義成軍時承德父顯爲隸人曹徽所害因奔南唐會議南征承德請自效至壽春劉仁贍堅壁不下承德出疲兵誘之傍伏精騎每戰陽不利北退三十里伏兵突起夾攻大敗之仁贍僅以身免三年世宗親征至壽州仁贍檻送徽等三人詔賜承德俸其甘心太祖與承德領前軍至紫金山吳人列十八砦壘攻破其二砦又敗泗州軍千餘於曲溪堰吳將林仁肇帥眾千餘水陸齊進船數艘載薪乘風縱火將焚周浮梁俄而風反承德

進兵敗之又夜使習水者沒其船下縻以鐵鑠引輕舫急擊吳人既不得進溺者甚眾奪數十艘永德解金帶賞習水者乃拒浮梁十餘步以鐵索千餘尺橫截長淮又維巨木自是備禦益堅俄又敗千餘眾於淮北岸獲船數十艘吳人多溺死詔褒美之冬擢殿前都點檢四年從克壽州還授檢校太尉領鎮甯軍節度五年夏命率步騎二萬拒契丹還駐瀋淵解兵柄加檢校太尉同中書門下平章事恭帝時移鎮忠武宋初加兼侍中入朝授武勝軍節度召對後苑每呼駙馬而不名俄歸鎮會討金陵永德造戰船數十艘運糧萬斛自額陽沿漢水而下富民高進豪橫真於法進潛詣關誣永德命樞密都承旨曹翰領騎兵察之得其實翰以進授永德永德遽就市笞而釋之時稱其長者太平興國二年來朝拜左衛

上將軍六年進封鄧國公端拱元年爲河北兩路排陣使屯定州嘗與遼戰斬獲甚眾淳化初知鎮州二年改泰甯軍兼侍中出判并州兼并代都部署永德明天文術嘗與僚佐會食有報遼兵寇州境者永德用太白萬勝訣占之語坐客曰彼雖以年月便利乘金而來反值歲星對逆兵家大忌必敗未幾折御卿捷報至眾始歡伏眞宗初進衛國公咸平初授太子太師分司西京仍以其孫大理寺丞文蔚釐務洛下以便就養二年冬將北巡以永德宿將召入對賜坐訪以邊要留爲東京內外都巡檢使三年授檢校太師彰德軍節度知天雄軍俄以老還鎮秋卒年七十三遣內園使馮守規護柩還贈中書令諸孫遷秩者五人文蔚至虞部員外郎文炳殿中丞

羅彥瓌太原人父全德晉沁州刺史彥瓌蔭補內殿直開運
初幸瀘州欲齎詔宣慰大名城中特選勇敢士十人彥瓌應
募銜枚夜發衝笑而入往返如期補興順指揮使後契丹命
送廐馬千匹赴幽薊至元氏聞漢祖起以馬歸太原漢祖嘉
之入汴擢護聖指揮使周初由散員都虞候遷馬步軍都軍
頭從向訓收秦鳳有功遷散指揮都虞使陳橋之變太祖自
仁和門入俄頃宰相范質等至尙未及對彥瓌挺劍而前厲
聲曰我輩今日必得天子太祖叱之不退質等由是降階聽
命擢控鶴左廂都指揮使改內外馬軍都軍頭從平澤潞破
李筠眾於碾子谷遷爲侍衛步軍都指揮領武信軍節度使
建隆二年出鎮彰德軍乾德二年復改安國軍與李繼勳大
破契丹兵四年春又與田欽祚破太原軍于靜陽擒其將鹿

英明年移鎮華州開寶二年卒

吳延祚字慶之并州太原人事周祖爲親校廣順初授莊宅副使權知鄆州世宗初累遷宣徽南院使判河南府知西京留守事汴河決督丁壯數萬塞之增築堤防自汴城至臨淮數旬訖工世宗北征權東京留守夏河決鄭州原武發近縣丁壯三萬餘塞之爲左驍衛上將軍檢校太傅樞密使宋初加同中書門下三品征李筠延祚曰潞城崑險且阻太行賊據之未易破也筠素勇而輕若速擊之必離上黨來邀我戰猶猷亡其藪魚脫於淵因可擒矣太祖遂行以延祚留守東京兼判開封府筠果領兵來戰澤州南敗走討李重進又爲東京留守建隆三年夏爲雄武軍節度秦州夕陽鎮西北多材植高防知州議就置采造務西夏酋尙波于率眾爭奪令

延祚代防齋詔赦尙波于等夏人感悅是年秋以伏羌地來獻乾德二年改鎮京兆開寶四年來朝俄疾駕臨問命薨艾次其腹尋卒年五十四贈侍中官給葬事延祚謹厚寡言性至孝母喪絕水漿累日好學聚書萬餘卷治家嚴尤奉釋氏子元輔字正臣好學善筆札累官定州鈐轄

王溥字齊物并州祁人父祚周隨商潁三州刺史以俸錢募人開大秦山砦梯路行旅頌之溥於漢乾祐中舉進士甲科爲祕書郎周祖討三叛辟從事河中平得朝貴及藩鎮交結書將按之溥諫魑魅之形伺夜而出日月既照氛沴自消順一切焚之以安反側周祖從之師還遷太常丞從鎮鄴廣順初授左諫議大夫樞密直學士厯端明殿學士拜中書侍郎平章事宣制畢周祖曰吾無憂矣世宗將親征澤潞獨贊成

之凱還加兼禮部尙書監修國史世宗嘗從容問曰漢相李
於以蠟書與遠信有之耶溥曰崧爲大臣設有此謀肯輕示
外人蓋蘇逢吉誣之耳乃詔贈其官將討秦鳳求帥于溥溥
薦尙撫事平世宗因宴酌酒賜溥曰爲吾擇帥成邊功者卿
也從平壽春加階爵顯德四年丁艱起復四表乞終喪乃入
謝六年夏命參知樞密院事恭帝加右僕射冬表請修世宗
實錄奏扈蒙張淡王格董道同加修纂從之宋初進位司空
罷參知樞密院乾德二年罷爲太子太保舊制一品班臺省
後上因見溥謂左右曰溥舊相當寵異之卽令分東西班遂
爲定制五年服闋加太子太傅開寶二年遷太子太師中謝
太祖曰溥十年作相三遷一品福履之盛近世未見其比太
平興國初封祁國公七年八月卒年六十一輟朝二日贈侍

中謚文獻博性寬厚美風度好汲引後進所薦至顯位者甚
眾好學手不釋卷嘗集唐會要百卷五代會要三十卷有集
二十卷子貽孫貽正貽慶貽序貽正至國子博士貽慶比部
郎中貽序景德二年進士後改名貽矩至司封員外郎貽孫
累遷右司郎中尤知名貽正子克明

伊審徵字申圖并州人父延瓌隨孟知祥入蜀知祥以女妻
之僭封崇華公主延瓌歷陵嘉眉三州刺史審徵至孝母病
割股肉啖之以父任歷蜀州刺史雲安推鹽使廣政十四年
召爲通奏使知樞密院事領武泰軍節度選其子崇度尙公
主又改節甯江同平章事與王昭遠並掌機務利事無大小
咸咨之常自以康濟經略爲已任宋師入境迎降授靜難軍
節度太平興國二年判右金吾衛仗雍熙五年卒

慕容延釗太原人父章襄州馬步軍都校領開州刺史延釗少以勇幹聞隸周祖帳下補西頭供奉官歷尚食副使鐵騎都虞候世宗授殿前散指揮使都校領溪州刺史高平之戰督左先鋒有功累遷鎮淮軍都部署顯德五年世宗駐迎鑾江口聞吳水艦數百泊東浦洲進爲左神武統軍命引驍騎由陸路進宋延隆督舟師沿江繼之遂大破敵淮南平遷殿前副都指揮使領淮南節度使恭帝改鎮甯軍充殿前副都點檢與宋祖同官友善宋祖常兄事之復爲行營馬步軍都虞候以先鋒重兵屯於真定宋初遣使諭旨許以便宜從事加殿前都點檢同中書門下三品數遣問勞猶以兄呼之延釗按治邊境以鎮靜聞征李筠與王全斌由東路會兵進俄爲行營都部署知潞州行府事平加兼侍中還澶州建隆四

年爲湖南道行營前軍都部署時被病御封藥以賜令肩輿
卽戎賊將汪端與眾數千擾郢州擒之磔於市荆湘平加檢
校太尉卒贈中書令追封河南郡王錄其子德業至衛州刺
史德鈞至尙食副使

楊美并州文水人本名光美避諱改狀貌雄偉武力絕人以
豪俠自任周祖征三叛杖策詣軍門與語壯之留帳下廣順
初累遷禁軍大校世宗征淮南以功擢鐵騎都指揮使領白
州刺史與宋祖故舊卽位授內殿直都知建隆三年爲北海
軍使政尙簡易民咸德之乾隆二年召還北海民詣闕乞留
詔諭之不去苦爲首者始罷遷馬步都頭討蜀爲歸州路戰
擢左右廂都指揮使蜀平遷內外馬步軍副都軍頭厯虎捷
左右廂都指揮使領河西軍節度使征太原爲行營馬軍都

虞侯太平興國二年出爲保靜軍節度使以疾解官詔遣內侍與道士馬志視之卒贈侍中命中使護葬美任氣好施凡得賜予及俸祿盡調親故死之日家無餘財人多嘆息之王守忠晉陽人父審琦周封陳王守忠累官衛州刺史入宋知興元太宗時歷知數州累遷威德軍觀察留後爲治簡靜喜與士大夫游時論多之

常延信并州平晉人祖思周昭義歸德平盧三鎮節度延信補牙職領和州刺史思卒入爲六宅使建隆初改領平州坐事貶右監門衛副率領護滑州黃河隄開寶中爲汴河南巡檢出爲潼關監軍關路巖險奏易道路及填禁坑役工四十餘萬雍熙三年督鎮州北芻糧冬爲全邵六州都巡檢使令疾置之任就馳入溪洞索誠州蠻歸款要領又直趣古鎮過

西延大水諸洞蠻人懼伏清化中厯襄鄧宋曹等州都巡檢使改左監門衛將軍屢部徒修護河防改左領軍左屯衛充西京水南都巡檢使擒彭婆鎮甲馬營盜咸平中厯太康鞏縣二監軍景德二年卒

王全斌并州太原人幼穎敏其父事唐莊宗爲岢嵐軍使私畜勇士百人莊宗召之懼不敢行全斌時年十二請以已爲質果獲全因隸帳下莊宗入洛累遷內職同光之難近臣宿將皆遁全斌獨與符彥卿等居中拒戰明宗初補禁軍列校晉初從侯益破張從賓遷護聖指揮使周廣順初爲龍捷右廂都指揮使討慕容彥超爲行營馬步都校從向拱平秦鳳從世宗平淮南復瓦橋關累遷相州留後宋初與慕容延釗由東路會大軍進討李筠以功拜安國軍節度使詔完葺西

山堡砦不踰時而就乾德二年伐蜀拜忠武軍節度西川行營前軍都部署率禁軍步騎二萬諸州兵萬人由鳳州路進討屢敗蜀軍由羅川趣深渡蜀人依江列陣以待又大破之蜀將王審超監軍趙崇渥遁去復有三泉監軍劉延祚樞密王昭遠澤州節度使趙彥韜引兵來戰三戰三敗追至利州北昭遠遁渡桔柏江焚其梁退守劔門遂克利州趨劔門次益光時京城大雪上設氊帷于講武殿衣紫貂裘帽視事謂左右曰我被服若此體尙覺寒念西征將士衝犯霜雪何以堪處卽解裘帽遣中黃門馳賜全斌仍諭諸將曰不能徧及也全斌拜賜感泣會諸將議曰劔門天險宜各陳進取之策侍衛軍頭向韜曰降卒牟進言益光江東越大山數重有狹徑名來蘇蜀人於江西置砦對岸有渡自此出劔關南二十

里至清強店與大路合於此進兵卽劔門不足恃也全斌卽欲卷甲赴之康延澤曰來蘇細經不須王師親行且蜀人屢敗并兵退守劔門命一偏師趣來蘇若達清強北擊劔關與大軍夾攻破之必矣全斌納其策命史延德分兵趨來蘇造浮梁于江上蜀人見梁成棄砦而遁昭遠聞延德兵趨來蘇至清強卽引兵退陣於漢源坡獨留偏將使守劔門全斌等擊破之昭遠彥韜皆走遣輕騎獲送關下遂克劔州殺蜀軍萬餘四年正月師次魏城孟昶遣使奉表降全斌入成都旬餘劉廷讓等始自峽路至昶餽遺及犒師並同全斌詔書頒賞諸軍亦無差降由是兩軍相嫉帥亦不協全斌雖小事不能卽決會詔發蜀兵赴關遂有全師雄之擾分兵招輯賊眾始息召還令中書問狀責授崇義軍觀察留後開寶末幸洛

陽郊祀召入侍祠面諭曰朕以江左未平慮征南諸將不遵紀律故抑卿數年爲朕立法今已克金陵還卿節鉞授武甯軍節度使仍以銀器萬兩帛萬匹錢千萬賜之至鎮數月卒年六十九贈中書令天禧二年錄其孫永昌爲三班奉職全斌輕財重士不求聲譽寬厚容眾軍旅樂爲用黜居山郡十餘年怡然自得識者稱之

安守忠字信臣并州晉陽人父審琦周平盧節度使封陳王守忠累官衛州刺史宋祖居潛雅相厚善卽位授左衛將軍自處益謙及從征太原多與謀略人罕知之建隆四年湖南平命爲永州刺史乾德中護河陰屯兵蜀平特命知興元府尋改漢州刺史朝使旁午出私錢給用太祖每戒使者言守忠在蜀能律已以正汝行見之當效其爲人開寶初改漢州

副曹翰塞澶州決河五年知遼州部民陰召并人斬以徇九年入并境燔砦四十餘議將深入會班師太平興國初移知靈州雍熙二年改易州徙夏州每西戎犯邊戰無不捷錄功就拜濮州團練使端拱中知滄州洺化二年徙雄州方宴軍軍校擐甲及闌守忠言笑自若徐顧坐客曰此輩酒狂爾擒之可也人服其量尋加麗州觀察使條陳邊事稱旨賜錢五百萬至道三年拜威德軍節度觀察留後徙宋州兼制置營田使威德兼著吏民不忍其去咸平三年入覲遣還卒年六十九贈太尉錄其子繼昌供備庫副使守忠謹慤淡薄爲治簡靜樂施予豐宴稿且喜從士大夫遊時論多之以父愛妓爲隸人所戕終身不蓄嬖妾而尤嗜佛云

馬峰并州太原人仕劉繼元至樞密副使左僕射致仕太宗

北征圍太原甚急國人猶欲堅守峯適病居於家昇入見繼元流涕以興亡論之繼元乃出降太原平爲將作監遷太府卿分司西京峰善服餌養生體強無疾頗好持論雍熙元年卒年八十餘

張繼能字守拙并州太原人父贊晉內班繼能建隆初以黃門事禁中太平興國初爲內品從征河東主城南洞屋遷高品爲高陽鎮定路先鋒都監從崔彥進戰長城口多所俘馘明年又與彥進敗遼於唐興口轉殿頭高品雍熙中監李繼隆軍徙護定州屯兵領驍捷卒三千屯五回嶺端拱初遷入內殿頭從趙保忠討李繼遷保忠薦其材命同經略代還掌內弓箭庫淳化三年與白承睿護芻粟入靈武命領驍卒五千同諸將主軍務俄爲本州都監城威州清遠軍護其役工

畢命同張延洲知軍事又同田紹斌掌積石砦遷內供奉官
靈環慶清遠軍後陣都監轉鬪敗西人遷涇原儀渭都巡檢
使眞宗遷崇儀使靈環十州軍兵馬都監兼巡檢安撫使咸
平三年爲川陝兩路招安巡檢使成都平留爲和州招安巡
檢景德二年又爲陝西捕賊巡檢獲千餘人四年討宜州卒
陳進爲廣南東西路安撫副使賊平授供備庫使大中祥符
二年擢入內侍省副都知時宗室說書給公膳專遣主之
七年爲涇原儀渭鎮戎軍兩路鈐轄徙鄜延都鈐轄先是內
屬戶殺漢口者止罰孳畜繼能則麗於常法由是西人不敢
犯日課卒截竹爲簽署字其上備將士記殺獲功狀賊聞之
甚懼歸朝復蒞羣牧仁宗在儲宮嘗親書一幅賜之繼能以
聞眞宗亦爲標題其末人以爲榮天禧三年遷崇儀使轉內

園使掌瓊林苑五年卒特贈汀州團練使繼能性沈密知兵喜讀書而好治生云

鄧守恩并州人十歲以黃門事太宗淳化中從王繼恩討成都盜至道初就護西蜀屯兵咸平初以大內高班爲鎮定都監入掌駟驥院龍騎卒剽環慶往擒翦之景德初爲澶州巡檢又使環慶戎澶巡察邊事大中祥符初按獄濮州雪寃人十餘天禧二年遷崇儀使三年授大內押班爲修滑州決河鈐轄改如京使還任四年春河復故道遷文思院使歸領昭州刺史守恩長七尺狀貌甚偉泣事幹敏以彊果稱五年卒年四十八贈淄州防禦使錄其子官

牛拱辰文水人天聖進士歷倅岢嵐定襄遷駕部員外賜三品服進虞部郎中知房陵所至去苛細而寬約束清心潔已

未嘗爲子孫業

潘夙太原人天聖中上書論時政授仁壽簿歷知韶滑桂州
累遷河北轉運使知河中府章惇察訪荆湖討蠻獠夙陳憂
邊狀知潭州再遷光祿卿知鄂州

丁儋嵐縣人天聖朝進士任樞密使文武兼全恩威并著弊
革而獄平化行而民安

以上太原府

許孝恭曲沃人淳化三年進士任彭州九隴縣尉兼主簿事
時李文吉刼州官吏盡避孝恭獨率公徒拒之擒文吉官至
虞部員外郎

史緒字仲昌曲沃人徽宗時爲左清道帥府副遷曉衛將軍
世明法律莊毅明恕雖家人相對無情容居官決讞持平不
移於私子籍仕金爲尙書比部郎中

以上平陽府

張藏英猗氏人唐相嘉貞後僑范陽後唐末舉族爲賊孫居道所害藏英年十七僅免後逢居道於幽州市引佩刀刺之不死爲吏所執節帥趙德鈞壯之釋不問以補牙職後因居道避地關南求爲關南都巡檢使至則微服攜鐵搥匿居道舍側伺其出擊之仆於地齧其耳吮之遂擒歸設父母位陳酒肴縛居道於前號泣鞭之齣其肉經三日剝其心以祭卽詣官首服官爲上請而釋之燕薊間稱報讎張孝子遼用爲盧臺軍使兼權鹽制置使領坊州刺史周廣順三年率內外親屬并部兵千餘人及煮鹽戶長幼七千餘口牛馬萬計舟數百艘航海歸周至滄州刺史李暉以聞令館於封禪寺俄賜襲衣銀帶錢千萬絹百匹銀器鞍勒馬世宗授德州刺史召歸詢備邊策藏英請以深州李晏口置砦及誘境上亡命

隸軍悉從之以爲緣邊招收都指揮使賜名馬金帶藏英遂築城李晏口累月募勁兵數千人王彥超巡邊爲遼所圍藏英率新募兵馳往擊之轉戰十餘里遼人解去改濮州刺史仍領邊任遼將高牟翰擾邊藏英追擊於胡盧河北自旦至晡殺傷甚眾牟翰遁後領兵巡樂壽遼驍將姚內斌偵知藏英兵少以精騎二千陣縣北藏英率麾下擊之自辰及申士皆殊死戰內斌遂解去降璽書褒美征瓦橋關爲先鋒都指揮使敗遼騎數百於關北下固安縣又改關南排陣使宋初遷瀛州國練使并護關南軍建隆三年卒年六十九

袁彥河中河東人少以趨勇隸奉國營漢乾祐中周祖討李守貞置麾下及鎮鄴爲部直小將周廣順中世宗在澶淵遷親事都校改開封府步直指揮使顯德初授內外步軍都軍

頭泉州刺史尋改岳州防禦使從征壽州爲城北造竹龍都
部署載甲士數百攻其城又修渦口橋成世宗幸焉因立鎮
淮軍命彥爲武信軍節度權侍衛步軍都指揮使又爲淮南
道行軍馬步軍副都指揮使賜衣服金帶鞍勒馬鎧甲器械
太祖下滁陽擒皇甫暉姚鳳彥皆有勞詔褒之又令屯下蔡
以遏壽春從攻濠泗擒南唐將許文綽邊鎬等師還授步軍
都指揮使領彰信軍節度六年春命發近畿丁壯浚五丈河
恭帝時命移保義軍宋初加檢校太尉來朝改鎮曹州乾德
六年移靜難軍開保二年移鄆州五年罷鎮歸卒年六十六
景德四年特錄其孫昭慶爲借職遷殿直

高冕字子莊河中虞鄉人錫兄子周顯德中詣闕上書稱旨
擢諫議大夫宰相范質以爲超擢太過特授將仕郎守右補

闕賜資加等宋初由膳部都官員外郎累至膳部郎中出知

益州雍熙二年卒贈右諫議大夫錄其子垂休

以上蒲州府

韓保正字永吉潞州長子人父昭運從孟知祥入蜀署珍州

刺史保正初事知祥爲押衙及僭位以爲豐德庫使累遷樞

密副使宣徽北院使爲北路行營都監以圖岐陽而晉昌趙

贊棄城東奔鳳翔侯益亦中變遂還成都俄爲雄武節度領

兵出新關至隴州漢兵固守保正無功而還宋初爲峽路都

指揮制置使屯夔州以經畫邊事及王全斌至保西縣被圍

遣人依山背城結陣以自固爲史延德所破被擒太祖召升

殿勞問賜袍笏金帶茵褥鞍勒馬仍賜甲第未及命官卒贈

右千牛衛上將軍

張延通潞州潞城人父彥威周右金吾衛上將軍延通穎悟

有才幹蔭補供奉官宋初厯通事舍人遷東上閤門副使開
寶中爲西川兵馬都監命同內客省使丁德裕引進副使王
班內臣張嶼領兵屯蜀郡德裕頗專恣延通面質其短德裕
銜之又疑延通與嶼爲黨會親征太原有使自行在至備言
上當盛暑躬冒矢石勞頓萬狀延通曰主上勤勞若此而吾
輩日享安樂蓋言不自安也德裕不答會歸闕德裕誣奏延
通嘗對眾言涉指斥及引問延通抗對不遜遂遇害

以上路安府

田紹斌汾州人仕劉鈞爲佐聖軍使戍遼州周顯德四年領
五十騎來歸世宗補驍武副指揮使宋初隨崔彥進征李筠
以功遷龍捷指揮使鑿澤州濠圍守流矢中左目前軍部署
韓令坤以聞及召見於潞州紹斌殺北漢軍益眾又從討李
重進於揚州壁城南圍三日城潰斬首踰千級賜袍帶繒帛

尋補馬軍副都軍頭龍衛指揮使又從平荆湖嶺南討蜀隸
劉延讓率所部敗全師雄於神泉時漢劍道梗因賴以甯遣
使賜資有加凡在蜀三歲剽盜殄除遣改龍捷都虞侯征江
南擇五百人爲步鬪軍并雲騎二千領之抵昇州城下克獲
居多親討河東敗遼兵於北百井太平興國初摧龍衛軍指
揮使領江州刺史二年擊梅山洞蠻至邵州大潰其眾擒蠻
二萬令軍中取利劍二百斬之餘五千遣歸諭諸洞自是帖
服端拱元年拜冀州防禦使尋改解州涇化中爲河中同丹
坊鄜延橫嶺蕃界都巡檢使鄭文寶議城席雞城砦爲清遠
軍紹斌領其役城畢命爲知軍事至道元年拜會州觀察使
仍判解州俄充靈州馬步軍部署領徒入蕃斬二千級獲羊
馬橐駝二萬計手詔嘉諭數部金粟帛詣靈武清遠遣人襲

服不擾未幾皇甫繼明白守榮等督轉餉於靈州紹斌率兵
援接抵賊井賊三千餘來薄陣且行且鬪至耀德凡殺千人
寇復尾後紹斌爲方陣使被傷者居中自將騎三百步弩三
百與敵兵礮於浦洛河大敗之旣而爲賊所圍守榮等自欲
邀功與戰大敗紹斌率所部徐還一無遺失優詔褒美就命
爲靈州都部署李繼隆言浦洛之敗紹斌握兵不顧自言靈
武非我不能守貶右監門衛率府副率統州安置眞宗召授
右監門衛大將軍領敘州刺史尋改萊州防禦使詔還其所
藉居第賜良馬十四調環慶靈州清遠軍部署慶州野雞族
數爲寇掠招其酋帥三人斷臂截剗放還寇帖服咸平二年
爲鎮定高陽關路押先鋒以勞遷邢州觀察使五年授右千
牛衛將軍致仕景德初起永城兵馬都監大中祥符初康州

團練使鞏縣都監二年卒年七十七紹斌長兵間習戰法累以格鬪立功子守信內殿崇班閤門祗候

楊瓊汾州西河人幼事馮繼業以材勇稱太宗召置帳下卽位隸御龍直御前忠佐馬步都軍頭領顯州刺史淳化中李順叛爲夔峽擒賊招安使領兵自峽上與賊遇累戰抵渝合進克資普二州雲安軍斬數千級詔書嘉獎卽軍中眞拜單州刺史至道初靈慶路副都部署河外都巡檢使捍禦有功導黃河溉民田數千頃敗賊於合河鎮北獲人畜亡算賊騎五百掠城下復擊破之追北三十里並賜詔嘉獎四年歷鄜州觀察使充靈環十州軍副都部署兼安撫副使夏人圍清遠軍頓積石河城遂陷逮繫流崖州明年移道州景德初起右領軍衛將軍分司西京累遷左領軍衛大將軍領賀州團

練使知兗州州卒言能飛行空中折其足奏戮之卒年六十
七錄其子舜臣爲奉職舜賓內殿崇班閤門祇候

侯益汾州平遙人以拳勇隸晉王麾下從莊宗攻大名先登
擒軍校擢馬前直副兵馬使征劉守光先登遷軍使破沼州
機石傷足莊宗親以藥傅之改護衛指揮使梁小將李立李
建以驍勇聞軍中憚之會戰河上益挺身出鬪擒二將遷馬
直指揮使入汴爲本直副都校從明宗討趙在禮益脫身歸
洛莊宗撫其背明宗立益面縛明宗曰爾盡忠節又何罪也
改本直左廂都校從討朱守殷王都並有功歷羽林軍五十
指揮都校領費州刺史應順初潞王舉兵鳳翔以益爲西面
行營都虞侯益稱疾出爲商州刺史蜀軍寇金州率鎮兵襲
擊大破之賜襲衣名馬加西面行營都巡檢使晉初召爲奉

國都校領光州防禦使張從賓據河陽以益爲西面行營副都部署率禁兵數千人次虎牢從賓軍萬餘人夾汜水而陣益親鼓士乘之大敗其眾擊殺殆盡汜水爲之不流從賓乘馬入水溺死築京觀刻石紀功拜河陽三城節度充鄴都行營都虞侯范延光降移鎮潞州天福四年晉祖追念虎牢功遷武甯軍節度同平章事遣中使謂益曰朕思卿前年七月九日大立戰功故復以此月此日徙卿鎮彭門領相印仍賜門戟改其里爲將相鄉勲賢里厯河中尹護國軍節度率僚屬歸汴契丹授鳳翔節度漢祖加兼侍中孟昶遣益所親掌樞密王回齋書招益復遣益故吏綿州刺史吳崇惲厚遣之益遂與其子歸蜀昶令何重建率川兵數萬出大散關以應之漢祖遣客省使王景崇率禁軍數千倍道趨岐下召益入

朝景崇至京兆合岐雍邠涇之師以破蜀軍會隱帝立益乃率數十騎奔入朝言景崇驕橫狀授開封尹兼中書令封魯國公景崇聞之遂據城害益親屬七十餘口周廣順初封楚國公改太子太師又改封齊國顯德元年致仕宋初遣賜器幣歲一來朝太祖以耆舊厚待之乾德初郊祀詔綴中書門下班禮與丞相等三年卒年八十贈中書令

以上汾州府

段思恭澤州晉城人祖昶神山令父希堯晉祖辟太原從事與桑維翰同幕府後至棣州刺史兼權鹽榷制置使思恭蔭署鎮國軍官天福中解官侍養入貢改國子四門博士賜緋開運初出爲華商等州觀察支使劉繼勳辟同州掌書記繼勳入朝會遼入汴軍士請爲帥思恭諭以禍福拒弗從乃止漢祖授左補闕隱帝時蝗請令諸州速決重刑無致淹濫必

召和氣從之。歷度支駕部。周顯德中。定濱州田賦。世宗嘉之。賜金紫服闋。拜左司員外郎。宋建隆二年。除開封令。遷金部郎中。乾德初。平蜀。通判眉州。時餘黨攻通州城。刺史趙廷進將奔嘉州。思恭止之。率屯兵與賊戰。彭山募先登。厚賞諸軍。賈勇大敗賊。矯詔以上供錢帛給之。後度支請按其罪。太祖憐其果幹。不許。令知州事。母憂起。爲考功郎中。知泗州。會馮繼業自靈州舉宗來朝。上以思恭代知州事。仍語之曰。馮繼業言靈州非衛霍名將鎮撫之。不可改其往哉。思恭曰。臣奉詔而往。必能治之。上壯之。賜窄衣金帶錢二百萬。仍令別齎金幣以遺諸部。思恭綏撫夷落。訪求民病。悉條奏免之。遷右諫議大夫。知揚州。兼沿江巡檢。歷知宿州。邢州。雍熙元年。再爲右諫議大夫。二年。知壽州。端拱初。歷遷給事中。尋知陝州。

淳化三年卒年七十三思恭踐更吏事所至著勤績子惟一
太常博士三司度支判官從子惟幾第進士兵部員外郎
張廷翰澤州陵川人初爲親校從漢祖入汴補內殿直遷東
西班牙軍使周初改護聖指揮使從平淮甸再遷鐵騎右第二
軍殿前散都頭都虞侯宋初權鐵騎左第二軍都校領開州
刺史從平揚州以功遷控鶴左廂都指揮使領果州團練使
尋轉龍捷左廂領春州伐蜀爲歸州路行營馬軍都指揮使
隨劉廷讓師次夔州頓兵白帝廟西蜀將武守謙拒戰逆擊
敗之於豬頭舖拔其城授侍衛馬步軍都虞侯領彰國軍節
度使開寶二年疾篤親臨問卒贈侍中

何漢榮陽城人深於韜略端拱中爲殿前承旨充澤州太行
路巡檢所到接下若無官然每恨不識文字常於馬上使人

讀孝經咸平中契丹屢侵河北漢榮爲先鋒屢擒渠魁敗之王超守定有尾大不掉之勢楊延釗扼於高陽關漢榮實與其謀乾興元年充山東山西都巡檢天聖中遷如京使安撫都監迨去任終於覃懷傳舍年七十二明道二年葬縣城北見進賢山長王虞碑記

張維則高平人幼修飭不苟同流俗試大理寺直驍騎尉以直諒聞中外受知仁宗景祐四年提典五房公事歷主客司郇中知晉州軍事入謝賜紫衣金魚袋

王友直高平人幼從父佐遊志復中原聞金主亮渝盟乃結豪傑謂之曰權所以濟事權歸守正何害於理卽矯制自稱河北等路安撫制置使以其徒王任爲副使徧諭州縣勤王未幾得眾數萬制爲十三軍置統制等官以統之進攻大名

一鼓而克撫定眾庶諭以紹興年號遣人入朝奏事未幾自壽春來歸詔以爲忠義都統制

段保高平人當宋行講武之制以騎射異等拜爵屢捍邊關嚴號令繕甲兵築城壘修屯田遇征討則備前驅授景陵衛指揮副使子孫世襲

都貺陵川人舉進士官至鴻臚卿每朝帝虛已咨問貺據經而對多見嘉納拜梓州轉運提押西川四十五州多著美績兄嚮及姪嘉猷皆舉進士嘉猷仕金至南京路兵馬都總管

多偉績

以上澤州府

郭崇應州金城人重厚寡言有方略後唐清泰中爲應州騎軍都校晉祖割雲應地奮身南歸歷鄆河中路三鎮騎軍都校開運中戍太原會漢祖起以崇爲前鋒入汴改護聖左第

六軍都校領郢州刺史改領富州從周祖平河中以功遷果
州防禦使領護聖右廂都指揮使周祖鎮鄴以崇領行營騎
軍兼天雄軍都巡檢使乾祐三年冬從周祖走慕容彥超於
劉子陂補侍衛馬軍都指揮使廣順初領定武軍節度未幾
命爲陳州節度加同平章事出鎮澶州促還鎮所世宗初并
人侵略命與符彥卿出固鎮以禦之世宗親征又副彥卿爲
行營都部署加兼侍中冬移正定尹成德軍節度四年契丹
騎萬餘掠邊崇率攻下束鹿縣斬數百級俘獲甚眾宋初加
兼中書令崇追感周室恩遇時復泣下監軍陳思誨密奏之
太祖曰我素知崇篤於恩義蓋有所激發耳遣人覘之還言
崇方對賓屬坐池潭小亭飲博城中宴然太祖笑曰果如朕
言未幾來朝改爲平盧節度乾德三年卒年五十八贈太師

子守璘洛苑副使妻卽明德后姊也子允恭以父任授殿直至崇儀副使知常州卒次女爲仁宗后

陸萬友蔚州靈邱人少業塲鋤隸太原爲裨校漢祖擢護聖指揮使出爲天雄軍馬軍都指揮使周初擢散員都指揮使領獎州刺史世宗時典龍捷控鶴虎捷軍頭領虔州團練遷閩州防禦使宋初歷沂斬二州改汝州討南唐命守采石磯浮梁事平遷和州防禦使太宗以爲晉絳等州都巡檢使從征太原克汾石二州就除石州都巡檢使兼知石州移巡警鳳翔秦隴代歸改知瀛州尋改右監門衛大將軍充河陰兵馬都監卒年七十三萬友以武勇自任太宗念其勲舊恩遇不替聘其次女爲許王夫人

周廣字大均應州神武川人父密晉鄜延晉三鎮節度使周

廣順初至太子太師致仕廣幼從父爲牙校漢初授供奉官尋擢左千牛衛將軍周祖討慕容彥超爲行營都監錄功遷右武衛俄改右神武充鎮淮軍兵馬都監從征淮南命安集江北數州民甚德之因領常州刺史兼內外馬步軍都軍頭淮南平改領眉州宋初授隰州刺史乾德三年遷潘州團練使令訓練雄武諸營開寶二年從征太原爲攻城樓櫓戰權都部署師還加內外馬步軍副都軍頭六年改右屯衛大將軍領郡如故太平興國二年卒

李漢超雲州雲中人初事鄴帥范延光鄆帥高行周皆不見信用會周世宗鎮澶淵委質焉及卽位補殿前指揮使三遷殿前都虞候宋初從平李重進遷齊州防禦使兼關南兵馬都監有民訟強娶其女爲妾及貨物不償者上問汝女可適

何人對曰農夫又問前漢超未至關南時何如曰歲苦契丹
侵暴上曰今復爾耶曰否上曰漢超朕貴臣汝女爲其妾不
猶愈於農婦乎使漢超不守關南汝尙能保其家之所有乎
遣之去已乃密諭漢超曰亟還其女并所貨不足於用何不
告朕耶漢超感泣誓以死報在郡十七年政平訟理吏民愛
之詣闕求立碑頌德詔徐鉉撰文以賜漢超素兄事馬仁瑀
仁瑀監軍霸州擅發麾下卒入遼境由是交惡上遣中使和
解賜以金帛太平興國初遷應州觀察使判齊州終關南都
巡檢使贈太尉忠武軍節度使漢超善撫士卒與同甘苦及
沒士多流涕

李重誨應州金城人祖高後唐莊宅使獎州刺史父彥榮仕
遼署環州刺史重誨嘗爲應州馬步軍都指揮使太平興國

五年從節度使蕭咄李迎潘美戰於代州北嶺大敗美擒重
誨以獻補鄧州馬步軍都指揮使會趙普出鎮奏監州軍雍
熙三年爲武州刺史忻州都巡檢緣邊十八砦招安制置使
賜服帶鞍馬遼兵入以所部邀戰敗之獲羊馬鎧甲甚眾賜
詔嘉美改廣桂融宜柳州招安捉賊使聽便宜從事至道初
累遷涇原儀渭鎮戎軍鈐轄咸平三年徙邠甯環慶坐轉餉
靈武至積石爲所掠流光州五年起內殿崇班鄜延駐泊都
監俄遷崇儀使景德中上以涇原地要兵眾徙爲鈐轄復遷
益州改皇城使大中祥符六年卒重誨純懿寡過上悼之命
其子乘傳往護柩歸聽止驛舍錄次子禹謨將作監主簿弟
重睿歷澄州團練使子禹偁閭門祇候

折德辰雲中大族父從阮自晉漢來據府州控扼西北仕周

平靜難軍節度使其鎮府州時署德展馬步軍都校廣順間
周世宗建府州爲永安軍以德展爲節度使時從阮鎮邠甯
父子並領節鎮時人榮之顯德中德展率師攻下河市鎮斬
并軍五百餘級入朝以其弟德愿權總州事迎謁于通許橋
請遷內地世宗以其素得蕃情不許厚加賜賚而遣之德展
未至德愿又破并軍五百餘於沙谷砦斬其將郝章張釗宋
初德展又破河東河谷砦斬五百級建隆二年來朝待遇有
加遣歸鎮乾德元年敗太原軍於城下擒其將楊璘二年卒
年四十八贈侍中子御勲字世隆開寶二年太祖征太原詣
行在謁見以爲永安軍留後五年來朝改泰甯軍節度使留
開封太平興國二年卒年四十贈侍中

以上大同府

薛超平城人膂力絕世乾德初應募爲虎捷卒從崔彥進伐

蜀以功補虞侯太宗時累遷至天武指揮使從征太原遷神衛軍都校後領澄州團練使

遼州以上

李謙溥并州孟人薨子性慷慨重然諾通左氏春秋從晉祖入汴補殿直奉使於遼改東頭供奉官及周祖討三叛守鄴都往來宣布密令甚愛之周廣順初遷供備庫副使征劉崇遼州刺史張乙堅壁不下單騎往說之乙以城降改開廐使爲晉州兵馬都監以徧師入河東境頻致克捷世宗親征淮南隰守卒謙溥謂節帥楊廷璋曰大甯咽喉要地不可闕守若俟報則孤城陷矣廷璋署謙溥權隰州至卽嚴飭守備凡八日并人果來寇拒卻之後旬餘復攻城與廷璋夾擊并人悉遁明年攻破孝義縣領衢州刺史恭帝時爲澶州巡檢使城莫州數旬而就改丹州謙溥少與宋宣祖同里閤弟謙昇

爲太祖布衣交母閭氏嘗厚待太祖旣卽位數迎閭氏入宮命左右掖之坐賜飲食話舊故賞資優厚建隆四年移謙溥慈州兼晉隰緣邊都巡檢行石州事以興同砦爲治所會命四路進兵孫延進等出陰地以謙溥爲先鋒因畫攻取策諸將共沮之不用軍還次白壁關謙溥請嚴備亦不聽乃獨令所部擐甲俄追騎至拒戰并人引退移隰州刺史征太原爲汾州路都監親征晉陽又爲東砦都監党進遣伐木西山并人逼西砦大將趙贊禦之不退謙溥亟麾所部赴之太祖遠至怪赴援者非精甲問之乃謙溥也甚喜謙溥在州十年敵人不敢犯境有招收將劉進勇力絕人撫之甚厚得其死力恒以少擊眾并人患之爲蠟丸書間進趙贊以聞謙溥願以舉宗四十口保進上悟釋之賜以禁軍都校戎帳服具進感

激願自効尋遷謙溥濟州團練使後邊將失律復以爲晉陽緣邊巡檢使邊民喜爭迎勞於道左六年領兵入太原連拔七砦以疾求歸卒年六十二上痛惜之賻贈有加葬事官給謙昇雍熙中許王納其女爲夫人擢如京副使子允恭內殿崇班閭門祇候

潘夙孟人美從孫天聖中夙上書推論時政授仁壽主簿歷知韶滑桂州累遷河北轉運使知河中府章惇察訪荆湖討蠻獠夙陳憂邊狀以知潭州再遷光祿卿知鄂州俱有惠於民

張象賢孟人皇祐進士授工部主事遷集賢學士兼尙書僕射性貞毅凡有私謁必嚴辭斥之弟象仁授校書郎言事落職隱白鹿山象儀亦進士擢殿中侍御史彈劾不避權勢轉

吏部尚書特進左僕射弟兄常以睦族爲訓子孫貴顯爲名臣者甚眾

侯道濟孟人祖元父暉皆以武勇聞道濟始以儒學登科任丹徒縣令贈比部員外郎子可孫仲良著書爲世名儒悉道濟家教云

李霖孟人少貧無書可讀乃傭書讀聰慧過人博古通今領元豐七年鄉薦授河南太守時逢凶荒人民流竄霖勞來安撫務得其所民戴之如父母

張文德象賢子熙甯間進士擢右正言轉光祿卿工部侍郎至禮部尚書卒清介自持人不敢干以私常曰吾祖家世儒業未嘗敢以貪污自累汝曹效之勿效吾之不才也吾見世之貪者不旋踵爲他人有貪究何益徒取後人笑耳汝能自

守縱不能以自大亦不失爲清白吏子孫也

吳師古孟人紹興初進士第一因錢青於金坐流袁州子元英觀文殿學士元美太常寺主簿三進恢復策秦檜矯詔竄容州孫芾尹隆州府曾孫直翰林學士

張崇嗣孟人舉進士遷樞密承宣檢校兵部尙書韓令坤以崇嗣剛直不阿門無私謁薦授成德軍節度使賜紫金魚袋

四子昭禮昭信昭義昭懿悉有令名

以上平定州

白重贊憲州樓煩人有武勇漢初自散員都虞侯三遷護聖都指揮使乾祐中爲河中行營先鋒都指揮使以功領端州刺史周祖轉護聖左廂都指揮使尋出爲鄭州防禦使改相州留後廣順中授義成軍節度河屢決親部丁壯塞大程六合二隄詔書褒美世宗征劉崇爲河東道行營馬軍都指揮

使與李重進樊愛能何徽合戰愛能微遁惟重贊與重進率所部力戰世宗自督親軍合勢薄之并人大敗以功授保大軍節度使及征太原河陽劉詞爲隨駕都部署命重贊副之契丹兵盛重贊擊走之改節河陽三城檢校太尉征淮南率親兵三千軍于潁上改淮南道行營馬步軍都虞侯俄徙節彰義宋初加檢校太師改鎮涇州馬步軍教練使李玉與部下閭承恕謀害重贊僞爲制書令都校陳延正夷其族上命六宅使陳思誨馳赴涇州擒玉及承恕鞠問伏罪俄改節泰甯乾德四年又改定國開寶三年改左千牛衛上將軍卒賀惟忠忻州定襄人少勇敢善騎射周祖討三叛惟忠謁於道左自陳有武藝留置所部後隸世宗帳下奏補供奉官初授儀鑾副使知易州繕完亭障撫愛士卒得其死力每乘塞

用兵所向必克以功遷正使開寶二年太祖駐常山以爲本
州刺史兼易定祁等州都巡檢使以中流矢金創卒上聞嗟
悼錄其子昭度爲供奉官惟忠性剛果知書洞曉兵法有方
略威名震北邊十餘年間遼人不敢南牧昭度至西京作坊
使知通遠軍

輔超忻州秀容人少勇悍有力晉開運中應募隸澶州軍籍
漢乾祐中從周祖討趙思綰攻永興城率驍勇十七人升雲
梯所壞北門樓而入士卒繼進城遂陷以功補小校顯德中
從太祖征淮南常執銳前驅轉日騎副兵馬使宋初從平上
黨再遷內直都知太宗選爲馬軍都軍頭征太原冒矢石攀
堞先登身被十三創上嘉其勇賜錦袍銀帶帛五十段詣朝
再乘城中流矢八復加厚賜襲范陽隸偏將米信爲田重進

先鋒取飛狐蔚州遷馬步軍副都軍頭出補曹州馬步軍都指揮使領峰州刺史改樂州召還轉都軍頭淳化三年出刺德州坐事責授右監門衛將軍領誠州刺史加都軍頭領澄州眞宗加領獎州團練使眞拜萊州團練使以老願留京師卒年七十七

以上忻州

朱光河曲人初仕周領永州防禦使宋受禪以翊戴功擢龍捷右廂指揮領軍征南伐竹爲筏倚道厲淮擾亂南寇得利而歸帝曰他日見君面今日見君心吾事就矣歷仕節度使太祖遊相扶杖造朝乞老卒封沛郡開國公

以上保德州

王繼勳陝州平陸人廣順初領汾州刺史充晉磁隰等州緣邊巡檢歷憲麟石慈四州刺史宋初遷磁州團練使坐荆罕儒陷降右監門衛率平荆襄權知道州劉鋹屢入寇繼勳上

嶺表可圖狀南伐爲賀州道行營馬步軍都監繼勲有武勇

在軍陣常用鐵鞭鐵槊鐵撾軍中目爲王三鐵

以上解州

母守素字表清河中龍門人父昭裔僞蜀宰相太子太師致仕守素弱冠起家祕書郎累遷中書舍人召見其二子克溫克恭並賜緋以次子克恭尙雅女廣政二年拜工部尙書命代昭裔判鹽鐵父子相代時人榮之奉親勤至雖隆暑暮歸必朝服執簡以申昏定禮蜀亡入朝授工部侍郎賜錢三百萬以充蜀中莊產茶園直仍賜第汴城坐事免開寶初起國子祭酒征河東命權知趙州及平嶺表移知容州兼本管諸州水陸轉運使先是逋賦代輸皆納其妻女以爲質守素表其事卽日降詔禁止六年卒昭裔性好藏書在成都令門人勾中正孫逢吉書文選初學記白氏六帖錢板守素齋至中

朝行於世大中祥符九年子克勤上其板補三班奉職次子

克恭尙昶女壘國主歸宋至左監門衛將軍

以上絳州

周惠字德輔爲江淮都轉運使先爲眞定等處參謀遺德餘

烈見於故翰林學士徐復齋及王秋澗碑記子諧

隰州

姚古五原人兒子以邊功累官熙河經略靖康元年與秦鳳

經略种師中及折彥質折可求勤王時趣召師道師道與古

子平仲先率兵入衛欽宗拜師道同知樞密院宣撫京畿河

北河東平仲爲都統制而种氏姚氏素爲山西巨室兩家子

弟不相下平仲恐功獨歸种氏忌之乃以士不得速職爲言

欲夜劫營謀泄敗旣而金退詔古等領兵十餘萬護送之金

陷隆德以古爲河東制置援太原古進兵復隆德府威勝軍

扼南北關與金人戰互有勝負太原圍不解詔古與師中特

角師中約古等齊進而失期不至師中敗於榆次金人進兵迎古遇於盤陀古兵潰退保隆德詔以解潛代之古屯威勝軍統制焦安節妄傳寇至以動軍情又勸古遁故兩郡皆潰中丞陳過庭劾奏安置廣州

姚平仲古之子靖康中爲太尉金人圍汴都平仲夜出將士攻敵營不利逸去隱青城大面山建炎初所在揭榜以觀察召之不出淳熙間人於丈人山見之年幾百餘

以上蒙古部

右宋六十八人

沙彥珣大同河陰人多勇略有大志唐明宗目爲人傑俾掌禁軍隨授彰國軍節度使後石晉割山後十六州賂契丹遇阿保機歸過雲中彥珣出迎遂被留禮遇同於宿將以功升始平安節度檢校太尉

右憲一人

段德祥陽曲人慈祥樂易遇事果敢金主聞其賢召至奇其狀貌授定襄縣主簿兼本縣尉

楊時洪洞人大定四年以本縣人爲本縣令勤撫字戒貪殘教民力本民化醇朴幾致刑措

張德直字伯直平陽人叔祖邦彥字彥才登科以當塗令致仕晉有松堂集父迪祿字仲英明昌初進士歷岐山上黨二縣令卒於省椽德直貞祐三年進士釋褐新平簿藍田令移爲通許名補省椽省選授巡院使終於同知武勝軍節度使事子誠居永甯

陳揮其先自洛徙臨晉家貧嗜學擢賢良方正官滋州司土曹有清操子顯正大中擢賢良方正拜儒林郎卒於官孫克

基天德三年進士第一官國子監丞克基子仲謙幼穎悟授書卽能通大義舉賢良方正任耀州三白渠規措使謝病歸與名人高士從容觴咏之樂十餘年卒年六十一封潁川郡伯仲謙子廣河東山西道行中書省參議庾平陽路提舉學校廩近侍局奉御膺東平路觀農使膺子元凱元至元間明經官河東山西肅政廉訪使追封潁川郡侯謚宣靖元凱子敬立由明經累官開城路總管府治中陳氏七世舉明經者四人擢賢良方正者三人舉進士者一人科第蟬聯可謂盛矣

胡光謙河中府人明昌三年四月壬寅朔尙書省奏提刑司察舉河中府胡光謙年雖八十三尙可任用勅召赴闕七月丁亥光謙至闕命學士院以雜文試之稱旨上曰朕欲親問

之八月辛亥特賜光謙明昌二年進士第三甲及第授將仕郎太常寺奉禮郎官制舊設是職未嘗除人以光謙德行才能故特授之

宋楫長子人天德年擢第除著作郎母老乞歸養後官至孟州防禦使子元吉元圭相繼登進士胥有名於時元吉爲兵部員外郎

張奕字彥微澤州高平人以蔭補官仕齊爲歸德府通判齊國廢偵知有兵二萬在郡將謀爲亂約夜半舉燎相應預選市丁校兵結陣要巷開小南門以示生路亂不得作質明亡匿略盡擒首惡誅之會都統完顏魯捕兵至欲根株餘黨奕保以闔門遂止承制除同知歸德尹事天眷元年以河南與宋改同知沂州防禦使事三年復取河南授汴京副留守歷

陳秦二州防禦使同知太原尹晉甯軍報夏人侵界詔往征之至境按籍各歸所侵土而還奏言折氏世守麟府以抗夏人本朝有其地遂以與夏夏人平折氏邱壠戮其尸折氏怨入骨髓而不得報今復使守晉甯故激怒夏人使爲鼠侵而條上其罪欲開邊釁以雪私仇耳今獨可徙折氏他郡則夏人自安朝廷從之移折氏守青州正隆間同知西京留守事遷河東北路轉運使大定三年徵爲戶部尙書甫視事得疾卒

張師穎高平人官震州均徭便民調解州沁陽令擢御史以明敏見稱授西京巡警使糾治畿輔人畏其嚴慝武甯軍節度使卒于官

路元高平人爲省曹尙書郎五典郡事不畏強禦人以路包

拯呼之累遷河間按察轉運使

張翬高平人忠信碩大以能吏稱仕至臨潢路同知轉運使
虞仲文字質夫武州甯遠人自少聰慧日記千言七歲知作
詩十歲能屬文既長刻苦學問登遼進士累仕州縣以廉能
稱復舉賢良方正對策優等擢起居郎史館修撰三遷至太
常少卿求歸養親久之召復前職宰相薦文行第一權知制
誥除中書舍人討平白霄拜樞密直學士權翰林學士爲翰
林侍講學士秦晉國王時任平章事都統降金授樞密兼侍
中封秦國公卒諡文正天會中贈中書令正隆改特進漢國
公

以上各
府屬

馬塘遼州人大定間爲長子令舊有訟年久不決塘至剖決
如流人皆懷服撫流亡均徭賦邑爲立去思碑

趙彝孟人金末爲太原府監軍使率躬効力艱險不避元興
遂隱不仕

陳毅忻州人明昌三年三月癸巳左丞完顏守貞言上嘗命
臣問忻州陳毅上書所言事其一極論守令之弊臣面問所
以救之之道莫之能言上曰方今正欲知其弊也彼雖無救
弊之術但能言其弊亦足嘉矣如毅言及隨處有司不能奉
行條制爲人傭僱尙須出力况食國家祿而乃如是得毋虧
臣子之行乎其令檢會前後所降條理舉行之

胡天祚字景山管州人初以鄉兵守禦本州累功授少中大
夫管州刺史興定二年遷授同知太原府事刺史如故會平
陽失守改同知平陽府事三年復取平陽請置平陽帥府乃
以天祚充便宜招撫使權元帥左都監四年封平陽公以平

陽晉安府隰吉州隸焉請升晉安翼城縣爲翼州垣曲絳縣隸之置平水縣於汾河之西又請升隰州之蒲縣爲蒲州大甯縣隸之改作城鎮爲作城縣胥從其請天祚守平陽四年屢有功詔錄其子定哥爲奉職元光元年十月青龍堡危急兵民皆潰執天祚出降招撫懷孟定哥聞之自經死贈信武將軍睢州同知仍詔張開郭文振招天祚天祚至濟源欲脫走先遣人奏表南京元將殺之

李師雄字伯威雁門人有材力喜談兵慕古之英雄故名師雄宋宣和中以騎射登科累官大名清平尉金師至出降攝兵馬都監爲齊大總管府先鋒都統制知淄州齊廢爲汴京馬軍都虞候歷知甯海軍曹州刺史皇統二年爲武勝軍節度使正隆末爲河州防禦使以事就逮臨洮宋將吳玘兵至

城下州人謀出降師雄止之宋將權儀鞭馬上浮橋射之墜橋下遂擒之宋師退後從元帥左監軍徙單合喜攻河州有功未幾疾卒

楊思義崞縣人年十四登第授文水簿調孟縣政績顯著尋遷太谷令

郭汝翼其先平陽人徙居保德遂占籍焉族繁盛俱業儒汝翼與弟汝霖俱以易學鄉舉汝翼授朝請郎集賢院校理

段鐸字文仲矩子少孤以孝謹聞有大志與兄鈞同登詞賦進士調長安簿遷兵部主事審決河北路刑獄授曹州刺史華州防禦使草疏求退躡進兩階加護軍武威郡開國侯以疾卒于家鈞孫恒字元貞應詞賦進士舉屢中至御試輒有蹉跌南渡之歲詔曾三赴廷試不中選年五十者賜同進士

及第人多冒濫求進恒獨曰吾實四十有九將欲求仕欺誦
可乎終不陳

右金十九人

又八人
附見

山西通志卷一百四十七